

摘藻堂四庫全書薈要

集部

欽定四庫全書薈要

集部

東坡全集卷一百十三

詳校官助教臣常循



欽定四庫全書薈要卷一萬四千九百四十四

集部

東坡全集卷一百一十二

宋 蘇軾 撰

內制口宣一百二十二首

賜大遼賀興龍節人使雄州回程御筵口宣

元祐


二年十二月

二十八日

有敕卿等聘事既成歸途尚邈屬此冰霜之候眷言來
徃之勤宜錫燕私少紓行役

賜大遼賀正旦使副春幡勝口宣

元祐二年十
二月二十九



日

有敕剪刻之工風俗惟舊眷皇華之在館屬春陽之肇
新宜有分頒以增賁飾

賜大遼賀正旦使副射弓例物口宣

元祐二年十二月二

十九日

有敕卿等出遊禁籞觀藝射侯弓矢既均禮儀卒度宜
加寵錫以侑燕歡

瀛洲賜大遼賀正旦人使回程御筵口宣

元祐三年

正月
五日

有敕卿等來脩舊好遠冒祁寒涉歷冬春服勤郵傳式
頒嘉燕以荅久勞

賜宰相呂公著上第二表乞致仕不允批荅口

宣

元祐三年三
月二十九日

有敕朕以冲眇垂拱仰成卿以耆老圖任共政無故而
去於義未安

賜宰相呂公著乞致仕不允斷來章批荅口宣

元祐三年

四月一日

有敕卿望重縉紳義均休戚如左右手可須臾離雖屢形於懇詞必難移於朕意

閣門賜新除守司空同平章軍國事呂公著誥

口宣

元祐三年
四月七日

有敕卿正位三公具瞻多士式資坐論以副仰成體朕眷懷服此明命

閣門賜新除宰相呂大防范純仁誥口宣

元祐
三年

四月
七日

有敕朕稽參衆庶登用俊良並建宰司同陞揆路祇承
明命仰副眷懷

賜新除尚書左僕射呂大防尚書右僕射范純

仁辭免恩命不允批荅口宣

元祐三年四月十一日

有敕卿望重縉紳才兼文武弼亮之選中外同然毋或
固辭以稱朕意

賜呂公著辭恩命上第二表不允斷來章批荅

口宣

元祐三年四月十二日

有敕卿以全德式符具瞻宜與師臣共為民表欽承明命佇聽嘉謨

賜范純仁呂大防辭恩命上第二表不允斷來

章批荅口宣

元祐三年四月十三日

有敕卿以宏材久與大政擢升宰輔實慰具瞻宜速拜嘉毋煩謙避

賜新除門下侍郎孫固辭免恩命不允斷來章

批荅口宣

元祐三年四月十四日

有敕卿金華雋老西樞舊臣與政東臺實慰輿議祇膺
成命毋復固辭

賜劉摯辭免恩命不允斷來章批荅口宣

元祐三年

四月十四日

有敕稽參衆言蔽自朕志西臺之貳無以逾卿亟踐厥
官毋煩固避

賜王存辭免恩命不允斷來章批荅口宣

元祐三年

四月十四日

有敕卿純忠許國雅望在人官以次升義無足避其承
休寵以副眷懷

賜胡宗愈辭免恩命不允斷來章批荅口宣

元祐

三年四月十四日

有敕卿雅望在人純忠許國既以彙進胡為力辭宜體
至懷即膺成命

賜趙瞻辭免恩命不允斷來章批荅口宣

元祐三年

四月十四日

有敕朝廷用人議論先定不次之舉非卿孰宜亟服休
恩毋煩固避

賜河北西路諸軍秋季銀鞋兼傳宣撫問臣寮

將校口宣

元祐三年四月十八日

有敕卿等憂寄之深疆事靡盬眷言勞勩想各平寧體
我至懷受茲時賜

宣詔許內翰入院口宣

元祐三年四月十九日

有敕卿拔自循良老於文學禁林之命儒者所榮往祇
厥司以究所蘊

白溝驛賜大遼賀坤成節人使御筵兼傳宣撫

問口宣

元祐三年四月二十二日

有敕卿等遠涉暑途來陳慶幣眷言徒御久犯風埃往
賜燕娛少休行役

賜大遼賀坤成節人使生餽口宣

元祐三年五月十日

有敕卿等肅將鄰好來慶誕辰徒馭久勞館宇初定宜

頒委積以示寵章

賜安燾乞退不允斷來章批荅口宣

元祐三年六月一日

有敕卿以舊德首冠西樞雅望既隆仰成彌重宜安厥位以卒輔予

賜北京恩翼等州修河官吏及都運運使運判
監丞等銀合茶藥并兵級等夏藥特支兼傳

宣撫問口宣

元祐三年六月十四日

有敕卿等夙夜河壩暴露野次屬茲暑雨深軫予懷往

示寵頒少慰勞苦

撫問保寧軍節度使知大名府馮京兼賜銀合

茶藥口宣

元祐三年六月十四日

有敕河役方興吏士在野暑雨之際綏御為勞膺此寵
頒尚加慎護

賜太中大夫守尚書左僕射兼門下侍郎呂大

防生日禮物口宣

元祐三年六月二十二日

有敕乃眷良辰篤生元輔豈獨縉紳之望允為河岳之

英今遣爾甥往致朕命受茲休寵永介壽祺

賜皇弟山南東道節度使開府儀同三司大寧

郡王佖生日禮物口宣

元祐三年六月二十二日

有敕乃眷賢王篤生茲日本枝之慶華萼相承宜分廐庫之良以致喬松之壽

賜大遼人使賀坤成節入見訖歸驛御筵口宣

元祐三年

七月八日

有敕卿等初祝使車已陳慶幣退安館舍往錫燕觴式

示眷懷且旌勞勩

賜大遼人使賀坤成節入見訖歸驛酒果口宣

元祐三年

七月八日

有敕卿等超庭致命就館即安少休行役之勞宜示眷懷之異式昭寵數徃錫甘芳

班荆館賜大遼賀坤成節人使回程御筵口宣

元祐三年

七月八日

有敕卿等使事畢陳還車載啟改轅而北弭節少留

就錫燕嘉式昭禮遇

玉津園賜大遼賀坤成節人使射弓例物口宣

元祐三年

七月九日

有敕卿等既陳慶幣復展射侯豈獨娛賓亦將觀德宜
有珍良之錫以旌審固之能

賜殿前司罷散坤成節道場香酒果口宣

元祐三年

七月
九日

有敕卿忠存衛上義切戴君爰祝壽山克成梵供宜加

寵錫以示眷懷

賜宗室開府儀同三司以下罷散坤成節道場

香酒果口宣

元祐三年七月九日

有敕卿以令德懿親共輸誠悃名藍法供虔祝壽祺既徹淨筵宜加寵錫

賜馬步軍司罷散坤成節道場香酒果口宣

元祐

三年七月十二日

有敕卿等共罄臣衷力祈慈壽爰脩法會亦既告成宜

有寵頒以旌誠懇

賜知樞密院事安燾已下罷散坤成節道場香

酒果口宣

元祐三年七月十二日

有敕卿等忠存廟社義篤君親嘉法會之有成祝聖齡於無極宜加寵賚以示眷懷

賜皇伯祖嗣濮王宗暉已下罷散坤成節道場

香酒果口宣

元祐三年七月十二日

有敕卿等為國懿親助我孝治祝慈闈之永壽成法會

於茲辰宜有寵頒以精忠悃

賜皇叔楊王醴泉觀罷散坤成節道場香酒果

口宣

元祐三年三月十二日

有敕卿等以周邵之親躬任如之眷一作養力祈壽嘏祇

扣佛乘既徹淨筵宜膺寵賚

賜太師文彥博已下罷散坤成節道場香酒果

口宣

元祐三年七月十二日

有敕元老在廷百官承式啟法筵於梵宇祝壽嘏於慈

聞宜有寵頒以助燕喜

相州賜大遼賀坤成節人使却回御筵口宣

元祐

三年七月
十三日

有敕卿等遠飭征驂少休近郡載惟勤勩良極軫懷往
錫宴觴以華歸騎

瀛洲賜大遼賀坤成節人使回程御筵口宣

元祐

三年七月
十三日

有敕卿等遠聘通歡言歸復命改轅北道弭節邊城宜

錫燕觴少休行役

賜護國軍節度使濟陽郡王曹佺罷散坤成節

道場香酒果口宣

元祐三年七月十三日

有敕卿以耆德首冠戚藩虔祝壽祺告成法會宜加寵賚以助燕私

班荆館賜大遼賀坤成節人使回程酒果口宣

元祐三年七月十三日

有敕卿等致命言還改轅伊始暑雨方作徒馭實勞宜

有寵頒以昭眷遇

就驛賜大遼國賀坤成節人使宴口宣

元祐三年七月

十六日

有敕卿等遠馳使傳來會誕辰言念勤勞宜加旌寵特頒燕喜以示眷懷

就驛賜大遼賀坤成節人使花酒果口宣

元祐三年

七月十六日

有敕卿等肅將慶幣來舉壽觴臨遣輔臣往頒燕豆仍

加寵賚以示眷懷

賜新除殿前副都指揮使武泰軍節度使苗授

辭免恩命第二表不允批荅口宣

元祐三年七月二十

日

有敕卿早練武經晚著邊効進持帥節實允僉言矧以
次遷無煩懇避

撫問秦鳳路臣寮口宣

元祐三年七月二十四日

有敕卿等久以選掄出分憂寄疆場之重綏御為勞宜

示眷懷往宣指諭

閣門賜新除徐王誥口宣

元祐三年八月十二日

有敕卿望隆尊屬德冠宗藩改殿大邦實諧群議往服朕命以為國華

賜皇叔新封徐王上第二表辭免恩命不允斷

來章批荅口宣

元祐三年八月十五日

有敕朕始升徐方以胙叔父庶幾大彭之壽罔愧元王之賢毋復屢辭亟膺成命

賜大師文彥博乞致仕不允斷來章批荅口宣

元祐三年
九月五日

有敕耆老在位華夷聳觀若聽公歸恐失民望朕命不
再公其少留

相州賜大遼賀興龍節使副御筵口宣

元祐三
年十一

月六
日

有敕卿等將命鄰邦服勤郵傳久薄風霧少休車徒宜
體眷懷式同燕衍

賜皇伯祖宗晟辭免起復恩命不允批荅口宣

元祐三年十一月十日

有敕官不可曠禮有從權苟愛君如愛親則王事為家事勉遵舊服少屈私誠

賜皇伯祖宗晟辭免起復恩命不允斷來章批

荅口宣

元祐三年十一月十八日

有敕卿哀慕未衰懇辭彌切既寒暑之一變宜忠孝之兩全勉從朕言起服乃事

賜駙馬都尉李瑋已下罷散興龍節道場香酒

果口宣

元祐三年十一月三十日

有敕震夙紀辰邇遐同祝乃眷戚藩之重預脩淨供之嚴亦既告成宜膺寵錫

賜殿前副都指揮使苗授已下罷興龍節道場

香酒果口宣

元祐三年十一月三十日

有敕卿等以衛上之忠屬誕彌之慶預嚴淨會以薦壽祺及此告成宜加寵賚

賜權管勾馬軍司公事姚麟已下罷散興龍節

道場酒果口宣

元祐三年十一月三十日

有敕卿等率職周廬歸誠梵宇共致延鴻之祝出於忠愛之深宜錫珍芳以助燕衍

興龍節尚書省賜知樞密院事安燾已下酒果

口宣

元祐三年十一月三十日

有敕卿等任重樞機忠存廟社屬誕辰之薦壽脩法會以告成錫以珍芳助其燕喜

賜大遼賀興龍節人使生餽口宣

元祐三年十一月一日

有敕卿等遠持慶幣申講鄰歡徒馭有華舍館方定宜往餽牽之錫以旌郵傳之勤

賜濟陽郡王曹佺罷散興龍節道場香酒果口

宣

元祐三年十一月一日

有敕卿寵冠戚藩望隆舊德將祝無疆之壽故脩最上之乘既徹淨筵宜膺寵錫

賜皇伯祖嗣濮王宗暉已下罷散興龍節道場

香酒果口宣

元祐三年十一月一日

有敕眷我宗英乃心王室脩彼龍天之供慶茲虹電之祥宜有頒分以成燕喜

賜皇叔祖同知太宗正事宗景罷散興龍節道

場香酒果口宣

元祐三年十一月一日

有敕乃眷宗英祗率藩服慶誕辰而薦壽脩淨會以告成宜有分頒以助燕喜

賜皇叔徐王罷散興龍節道場香酒果口宣

元祐

三年十二月二日

有敕卿望隆周召德邁間平屬誕慶之紀辰仗佛乘而薦祉助茲宴喜錫以柔嘉

賜文太師已下罷散興龍節道場香酒果口宣

元祐三年十二月二日

有敕乃眷師臣身先百辟有嚴淨供祇薦萬齡宜有分頒以助燕喜

賜樞密安燾已下罷散興龍節道場香酒果口

宣

元祐三年十一月二日

有敕樞機之臣社稷是衛夙設人天之供共祈箕翼之祥宜膺寵頒式助燕喜

班荆館賜大遼賀興龍節人使到闕御筵口宣

元祐三年十

二月五日

有敕卿等遠將鄰好至止都門屬霜霧之嚴凝念車徒之勤瘁宜伸燕衍以示眷懷

賜大遼賀興龍節人使朝辭訖就驛酒果口宣

元祐三年十

二月五日

有敕卿等畢事告旋指期言邁念征途之勞瘁迫徂歲之沍寒體我至懷膺茲寵錫

賜大遼賀興龍節人使朝辭訖歸驛御筵口宣

元祐三年十

二月五日

有敕卿等聘事告成陞辭言邁念歸途之云遠復賓館之少留體我眷懷共茲宴喜

七日賜大遼賀興龍節人使內中酒果口宣

元祐

三年十二月五日

有敕卿等杞車就館布幣造廷既欣鄰好之脩復歎使華之美就加寵賚式示眷存

玉津園賜大遼賀興龍節人使射弓御筵口宣

元祐三年十二月五日

有敕卿等使節有華鄰歡載講既娛賓於靈囿將觀德於射侯宜有寵頒以旌命中

相州賜大遼賀正旦人使御筵口宣

元祐三年十二月六

日

有敕卿等春朝畢會鄰聘交馳屬徂歲之沍寒念遠勤
於行李往頒燕衍以重使華

班荆館賜大遼賀興龍節人使回程御筵口宣

元三年十
二月六日

有敕卿等告辭中禁改乘北轅屬晚歲之嚴凝念征途
之悠緬往頒嘉燕可復少留

十日賜大遼賀興龍節人使內中酒果口宣

元祐

三年十二月七日

有敕卿造廷稱壽率禮可觀豈惟鄰好之脩亦見使華之美宜膺寵錫以示至恩

班荆館賜大遼賀興龍節人使却回酒果口宣

元祐三年十

二月七日

有敕卿等改轅北路供帳都門風埃浩然徒馭勤止宜膺寵錫以示恩華

瀛洲賜大遼賀興龍節人使回程御筵口宣

元祐

三年十二

月七日

有敕卿等回車北道弭節邊亭使事已終歸驂少憇往
頒燕衍益厚眷存

賜皇弟普寧郡王似生日禮物口宣

元祐三年
十二月七

日

有敕朕之介弟生以茲辰眷棣萼之相輝祝椿齡之難
老宜同慶喜往致寵頒

相州賜大遼賀興龍節人使回程御筵口宣

元祐

三年十二月九日

有敕卿等夙駕歸軒少休旁郡眷言勞勩良極顧懷往
錫燕嘉以旌恩眷

趙州賜大遼賀正旦使副茶藥口宣

元祐三年十二月十

日

有敕卿等遠脩舊好屬此沍寒載歷山川久蒙霜露宜
有精良之賜式彰軫念之懷

趙州賜大遼賀太皇太后正旦使副茶藥口宣

元祐三年十
二月十日

有敕卿等遠馳四牡來慶三朝屬此歲寒勞於行役宜
膺寵錫以示眷存

興龍節尚書省賜宰相已下酒果口宣

元祐三
年十二

月十
日

有敕誕彌之慶中外所同眷我臣鄰共茲燕喜宜加寵
賚以示眷懷

就驛賜大遼賀興龍節使副鈔鑼等口宣

元祐
三年

十二月二十日

有敕卿等肅將鄰好遠涉寒塗眷言授館之初宜有勞來之禮往加寵錫以示眷懷

玉津園賜大遼賀正旦人使射弓例物口宣

元祐

三年閏十二月三日

有敕射以娛賓抑將觀德發而命中曾不出正宜旌審固之能膺受珍良之賜

撫問知大名府馮京口宣

元祐三年閏十二月八日

有敕卿等夙分重寄言念久勞歲聿云周王事靡盬益
加輔養以副眷懷

冬季傳宣撫問河北東路沿邊臣寮口宣

元祐三年

閏十二月八日

有敕疆場之守職思其憂霜露既凝歲聿云暮宜加厚
愛以副眷懷

賜大遼賀正旦人使銀鈔羅唾孟子錦被等口

宣

元祐三年閏十二月十八日

有敕卿等遠將鄰好來慶春朝眷言跋履之勤宜有珍
華之錫受茲異寵體我至懷

雄州撫問大遼賀正旦人使口宣

元祐三年閏
十二月二十

五
日

有敕卿等肅將慶幣來會春朝遠犯風埃實勞徒馭欣
聞入境良尉眷懷

賜大遼賀正旦人使正月一日就驛御筵口宣

元祐三年閏十
二月二十五日

有敕使華遠至春律肇新即卿舍館之安昭我惠慈之眷往陳燕豆以樂佳辰

賜大遼賀正旦人使內中酒果口宣

元祐三年閏十二月

二十五日

有敕卿等瑞節華軒來脩舊好醇醪珍寶以薦新春膺此寵頒體予異眷

班荆館賜大遼賀正旦使回程御筵口宣

元祐三年

閏十二月二十五日

有敕卿等使事告成旋車言邁方改轅於北道暫弭節於都門昭示眷懷少留宴衍

賜于闐國進奉人正旦就驛御筵口宣

元祐三年閏十月

二月二十五日

有敕重譯遠來觀光戾止屬人正之改律樂天敘之發春宜示寵休式同燕喜

雄州賜大遼國賀正旦人使回程御筵兼傳宣

撫問口宣

元祐三年閏十月二十五日

有敕卿等已事告歸柅車少憩眷言長道遠犯餘寒宜錫燕嘉以旌勞勩

瀛洲賜大遼賀正旦人使回程御筵口宣

元祐三年

閏十二月二十九日

有敕卿等已聘言還犯寒遠邁方脂車於北道復弭節於邊城宜錫宴嘉以旌勞勩

班荆館賜大遼賀正旦人使却回酒果口宣

元祐

四年正月一日

有敕卿等還璋言邁弭節少留念鞭轡之方勤涉冰霜之餘凜宜陳燕俎以寵歸軒

正月六日朝辭訖就驛賜大遼賀正旦人使御

筵口宣

元祐四年正月一日

有敕卿等使事告成陞辭言邁命近臣之往勞庶遠道之少留體我眷懷共茲宴衍

撫問廊延路臣寮口宣

元祐四年正月八日

有敕卿等分寄邊陲輯寧吏士眷言勤勩良極軫懷往

致朕言各宜尚慎

撫問廊延路臣寮口宣

元祐四年六月十一日

有敕卿等各膺器使祇服邊陲眷茲靖安時乃忠力特加勞問以示顧懷

賜右正議大夫守尚書左僕射呂大防生日禮

物口宣

元祐四年六月十一日

有敕惟茲穀旦生我元臣爰分服食之良徃助閨門之喜式為爾壽宜識朕心

賜皇叔徐王顥生日禮物口宣

元祐四年六月二十一日

有敕乃眷賢王實為社稷之衛載臨誕日永集邦家之休臨遣使車往致眉壽

就驛賜大遼賀坤成節人使銀鑼等口宣

元祐四年

六月二十三日

有敕卿等遠勤使節展慶誕辰畏暑長途方即安於舍館精金良幣宜往致於恩私

賜皇弟大寧郡王佖生日禮物口宣

元祐四年六月二十

五
日

有敕桑蓬示喜復臨載育之辰金幣展親徃致友于之
愛膺子寵賚俾爾壽昌

班荆館賜大遼賀坤成節國信使副到闕酒果

口宣

元祐四年
七月四日

有敕卿等抗旃遠道解鞅近郊念館舍之未安宜驂駢
之少憇式頒芳旨以示眷懷

賜馬步軍大尉姚麟已下罷散坤成節道場香

酒果口宣

元祐四年
七月四日

有敕卿等誕辰祇慶法會告成嘉與幽生同躋壽域往
頒芳旨以勞忠勤

賜大遼坤成節使副生餽口宣

元祐四年
七月七日

有敕卿等抗旌暑路弭節驛亭眷惟行李之勤徃致珍
鮮之餽膺茲寵數明我眷懷

雄州白溝驛賜大遼賀坤成節人使却回御筵

兼傳宣撫問口宣

元祐四年
七月七日

有敕卿等飛蓋西風改轅北道喜山川之漸近忘徒御之久勞徃致眷懷少留燕衍

王津園賜大遼賀坤成節人使射弓例物口宣

元祐四年
七月八日

有敕卿等圭璋致命既已講歡弓矢娛賓亦將觀德宜有瓊華之賜以旌審固之能

賜殿前都指揮使以下罷散坤成節道場香酒

果口宣

元祐四年
七月九日

有敕誕彌之慶海宇攸同嘉將帥之協恭設人天之妙果宜均寵錫以示褒優

賜皇伯祖高密郡王宗晟以下罷散坤成節道

場香酒果口宣

元祐四年
七月九日

有敕眷我宗英志存忠報脩等慈之妙供祝難老之昌期嘉此精誠均其慶賜

賜同知樞密院事韓忠彥已下罷散坤成節道

場香酒果口宣

元祐四年
七月九日

有敕嘉我樞臣義均一體脩茲淨供慶續千齡不有寵
頒曷旌忠報

相州賜大遼賀坤成節人使却回御筵口宣

元祐

四年七月九日

有敕鄰好既成使華有耀眷邦畿之漸遠念郵傳之方
勤服我恩私少留燕喜

賜大遼國賀坤成節使副時花酒果口宣

元祐四年

七月十日

有敕鄰歡既展賓館歸休宜分醖筭之醇復致瓜華之
侑少將至意其服茂恩

賜平海軍節度使駙馬都尉李瑋已下罷散坤

成節道場香酒果口宣

元祐四年
七月十日

有敕卿等義重戚藩志同忠報屬誕辰之均慶嘉法會
之告成宜示褒優特加寵賚

坤成節尚書省賜宰臣已下御筵酒果口宣

元祐

四年七月
十一日

有敕忠存柱石誠貫人天共欣誕日之臨既畢祇園之會宜頒芳旨以助燕私

坤成節賜同知樞密院事韓忠彥已下尚書省

御筵酒果口宣

元祐四年七月十二日

有敕脩佛勝因祈天永命既肅成於梵供益表見於忠誠宜有寵頒以同燕喜

賜徐王罷散坤成節道場香酒果口宣

元祐四年七月

十二日

有敕卿親賢莫二忠孝實兼饌蒲塞於祗園薦椿齡於
崇慶喜成法會宜有寵頒

賜大遼賀坤成節人使朝辭訖歸驛御筵口宣

元祐四年七
月十二日

有敕卿等已聘告歸少休就館即頒燕俎臨遣輔臣式
示異恩以榮回馭

班荆館賜大遼賀坤成節人使回程御筵口宣

元祐四年七
月十二日

有敕卿等方事回轅聯茲弭蓋念征途之尚永加秋暑
之未衰往錫燕嘉少休徒馭

賜宰相呂大防已下罷散坤成節道場香酒果

口宣

元祐四年七
月十二日

有敕卿等竭誠衛上體國均休恪脩西竺之儀仰獻南
山之祝宜膺寵錫以示褒優

賜大遼賀坤成節使副內中酒果口宣

元祐四
年七月

十二
日

有敕卿等來陳慶幣克講鄰歡載嘉遠聘之勤宜示寵綏之意頒茲芳旨服我恩私

賜大遼賀坤成節人使朝辭訖歸驛酒果口宣

元祐四年七月
十二日

有敕卿等遠敦使事率禮無違既上謁辭言還有日宜加頒錫益示寵榮

坤成節就驛賜阿里骨進奉人使御筵口宣

元祐

四年七月
十四日

有敕汝等來脩貢篚適逢誕辰宜均慶賜之恩共樂亨嘉之會往頒燕俎咸極歡心

瀛洲賜大遼賀坤成節人使回程御筵口宣

元祐

四年七月十四日

有敕鞭轡既勞封疆漸邇雖勤歸念少憇暑途服我恩私式同燕喜

坤成節就驛賜于闐國進奉人使御筵口宣

元祐

四年七月十四日

有敕汝等奉琛遠至授館少留適遘誕辰宜均慶澤欽承恩渥共樂燕私

班荆館賜大遼賀坤成節人使回程酒果口宣

元祐四年七月十七日

有敕卿等奉璋來聘弭節言還眷此暑途少留歸馭往頒燕俎式示恩私

賜新除守司空同平章軍國事呂公著辭免不

允批荅口宣

有敕朕圖仕元老以表四方以卿望在士民心存社稷
勉膺異數式副僉言

賜皇弟普寧郡王似生日禮物口宣

有敕歲將更端月亦既望實以茲日篤生賢王宜厚寵
頒以介多福

班荆館賜大遼賀坤成節人使回程香酒果口

宣

有敕卿等講成聘禮歸次都門復此少留逝將言邁宜

頒錢竿以寵行駭

東坡全集卷一百一十二

欽定四庫全書薈要卷一萬四千九百四十五

集部

東坡全集卷一百一十三

宋 蘇軾 撰

內制批荅七十六首

賜正議大夫同知樞密院事安燾乞外郡不許

批荅

元祐元年
十月八日

覽表具之卿以應務之才居本兵之地綏靜中外人無
間言何疑上章欲求去位未喻厥意聞之憮然夫榮親
莫大於功名養志不專於甘旨而况魏闕之下父母之

邦退食問安孰便於此勉循其舊以卒輔予

賜安燾乞外郡不允批荅

元祐元年十月八日

省表具之夫事親者不擇地而安之孝之至也而况艱難之際一日萬幾永淵之懼當務同濟卿練達兵要灼知邊情寄託之深義難引去亟求自便朕何賴焉

賜新除中大夫守尚書右丞劉摯辭恩命不許

斷來章批荅

元祐元年十一月

覽表具之道有行藏時有用捨歲不我與難以智求道

之將行豈容力避大言大利固當安而受之小行小廉非所望於卿者成命不再可無復辭

賜劉摯辭免恩命不允斷來章批荅

元祐元年十一月

省表具之政如農耕以既獲為能事言如藥石以愈疾為成功若耕不獲疾不愈朕何望焉所以用卿者非以富貴卿也勉卒成業何以辭為

賜太師文彥博乞致仕不許批荅

元祐二年三月二十九日

卿出入四世師表萬民無羨於功名而有厭於富貴其

所以忘身徇國捨逸就勞者豈有求而然哉凡以先帝之恩生民之故也卿之在朝如玉在山如珠在淵光景不陳而草木自遂去就之際損益非輕昔西伯善養老而太公自至魯穆公無人子思之側而長者去之卿自為謀則善矣獨不為朝廷惜乎藥餌有間時遊廟堂家居之樂何以異此

賜太師文彥博乞致仕不允批荅

元祐二年三月二十六日

朕脩身以承六聖虛已以聽四輔而法度未定陰陽未

和民未樂生吏未稱職中夜以思方食而歎雖不敢以
事諉元老實望其以身率百官卿猶未即於安孰敢不
盡其力此聖母冲人之本意而天下有識之所望也昔
唐太宗以干戈之事尚能起李靖於既老而穆宗文宗
以燕安之際不能用裴度於未病治亂之效於斯可見
朕意如此卿其少安

賜宰相呂公著乞退不許批荅

元祐二年三月二十九日

卿才全而德備積厚而施博明亮篤誠坐屈群策既以

天下公議而用於此矣豈以卿之私意而聽其去哉水旱之災不德所召卿當助我求所以消復之道不當求去我也詩不云乎大夫君子昭假無羸大命近止無棄爾成勉思厥職以荅民望

賜宰相呂公著乞退不允批荅

元祐二年三月二十九日

用賢之功必要之久遠日計不足歲計有餘朕之用卿期於百姓之既富卿之自信亦豈一日而成功常暘之災天以警朕夙夜祇懼與卿同之朕若歸過於股肱何

以荅天戒卿若釋政而安逸何以塞民言各思其憂少
安厥位

賜尚書左丞李清臣乞退不允批荅

元祐二年四月十八

日

卿以方聞之舉擢自厚陵禁林之選用於神考逮受顧
命弼予冲人義既同於戚休身豈輕於出處遽欲引去
聞之惻然姑安厥常以助予治

賜尚書左丞李清臣乞退不許批荅

元祐二年四月十八

日

祥除之初念我聖祖所與共政不忘舊人而卿博學多聞通練古今小心畏慎不見過失力求引去為之惘然勉留輔予益祇厥服

賜文武百寮文彥博以下上第一表請皇帝御

正殿復常膳不允批荅

元祐二年四月二十二日

朕即位二年水旱繼作致災之故實惟冲人既延及於無辜復貽憂於文母是以坐不安席食不甘味實欲深

念厥咎豈徒見之空言而雨不崇朝農猶告病欲徇來
請惕然未寧其一乃心勉正厥事毋重朕之不德以荅
天之深戒

賜文武百寮文彥博已下上第一表請太皇太

后復常膳不許批荅

元祐二年四月二十日

旱暵之罰自冬及夏天之降災如此其久則夫致災之
道豈一日而然哉雖力行罪已之文尚恐非應天之實
而卿等以膚寸之澤遽欲即安覽之惕然未敢自赦其

交修不逮務盡厥誠期茲歲於有秋雖復常其未晚

賜文武百寮文彥博已下上第五表請皇帝御

正殿復常膳允批荅

元祐二年五月二十九日

朕以寡昧膺受多福常欲損上益下畏天之威矧茲旱
灾咎在不德而卿等以雨澤既至封章屢上勉從其意
甚媿于中夫天之有風雨雷霆猶朕之有號令賞罰朕
不脩明其事何以責應于天永思其終無忘納誨

賜文武百寮文彥博已下上第五表請太皇太

后復常膳許批荅

元祐二年五月二十九日

德積無素民罹其災精誠莫通禱不時應雖蒙膏澤之報僅救焦枯之餘勉徇來章猶虞後患其謹視盜賊慙卹流亡益務交脩以裨不逮

賜文武百寮太師文彥博已下上第一表請舉

樂不許批荅

元祐二年六月一日

先王之禮樂因情而立文君子之哀樂自中而形外夫有莫大之戚則有無窮之悲先皇帝天覆四方子養萬

物至今窮髮之表尚餘流涕之民而況宮庭之間母子之愛粗畢三年之制遂講八音之和所未忍聞非不欲作卿等謹於率禮篤於愛君徒欲亟舉舊章顧未深明吾意三復太息難於黽從

賜文武百寮太師文彥博已下上第一表請舉

樂不允批荅

元祐二年六月一日

禮之至者無文哀之深者無節故禫而不樂古人非以求名琴不成聲君子以為知禮朕以宗廟之重勉蹈先

帝之餘履其位惕然而自驚用其物潛焉而出涕未報
昊天罔極之德常懷終身不忘之憂欲從衆言亟舉備
樂而金石絲竹乃悽耳之聲干戚羽旄皆泣目之具哀
既未泯樂何從生再閱來章徒增感慕

賜文武百寮太師文彥博已下上第二表請舉

樂不許批荅

元祐二年
六月四日

過密之制雖盡於三年追懷之私豈論於歲月金石在
御惻然未寧吾不以一身之憂廢天下之樂今施之郊

廟用之軍旅州閭之會絃歌相聞獨盡餘哀止於中禁
以為於義未害是故行之不疑

賜文武百寮太師文彥博已下上第二表請舉

樂不允批荅

元祐二年
六月四日

朕少遭閔凶僅畢祥禫雖俛就企及非以過制為賢而
創巨痛深不能以禮自克觀過其黨聖人許之禮曰喪
三年以為極亡則弗之忘矣誠重違國老之忠告姑欲
盡人子之至情

賜太師文彥博等請太皇太后受冊第二表不

許批荅

元祐二年
六月四日

吾聞聖人以天下為憂未聞以位號為樂也損已裕物
畏天檢身此吾平日之本心非獨遇災而一發也孔子
曰以約失之者鮮矣卿等以是輔我顧不美哉

賜文武百寮太師文彥博已下上第四表請舉

樂不許批荅

元祐二年
六月九日

吾之本性以清淨寂寞為樂雖在平日無游觀聲伎之

念矧艱難之後哀疚之餘中夜以興方食而歎將不堪其憂者豈有意於樂哉雖欲勉從未能自克忠告屢却愧歎兼深

賜文武百寮太師文彥博已下上第四表請舉

樂不允批荅

元祐二年六月九日

鐘鼓以導和羽籥以飾喜璧之飲食之節適於口體之宜今衰麻之除莫敢逾制而琴瑟之御則有未安卿等忠誠確然開喻至矣惟反求諸心而弗得故欲行其言而未能推之人情當識朕意

賜太師文彥博等上第三表請太皇太后受冊

許批荅

元祐二年
六月九日

吾上順帝則下酌民言處以無心期於寡過卿等以為
協氣既應羣謀僉同若固違典禮之常恐莫慰天人之
望遇災而懼昔者非以為謙聞義則遷吾亦豈敢自必
勉從故事以副嘉言

賜新除中大夫守尚書右丞王存辭免恩命不

允斷來章批荅

元祐二年六
月十二日

士有品目定于僉言器之廟堂蔽自朕志豈有僉言既
穆朕志不移而用過謙之詞反已成之命亟服乃事宜
無復云

賜新除中大夫守尚書右丞王存辭免恩命不

許斷來章批荅

元祐二年六月十二日

為國不患於無人有人而不用之為患事君非難於辭
寵居寵而無媿之為難吾之用卿計已審矣卿之自信
又何疑哉

賜新除知樞密院安燾辭免恩命不許斷來章

批荅

元祐二年六月二十四日

覽表具之論材考德聖人所以公天下難進易退君子所以善一身權之以義孰為輕重訓兵論將威懷戎狄卿以是事上豈不賢於逡巡退避也哉

賜新除知樞密院安燾辭免恩命不允斷來章

批荅

元祐二年六月二十四日

覽表具之德稱其服臣主俱榮食浮於人上下交病朕

之為天下慮甚於卿之自為謀也思而後行有出無反
成命不再卿毋復辭

賜新除檢校太尉守司空依前開府儀同三司

致仕韓絳辭免恩命不允批荅

元祐二年
七月七日

國家尊異耆老砥礪廉隅凡致為臣必厚其禮而况卿
出入四世師表萬民身任安危位兼將相永惟三宗眷
遇之重宜極一品褒崇之榮成命既孚僉言惟允宜從
中外之望罔徇謙冲之私

賜韓絳辭免恩命不允批荅

元祐二年七月七日

朕惟耆老成人雖或謝事耄期稱道終不忘君其在丘園豈殊廊廟嘉猷入告卿其不易此心大事就訪朕亦敢忘斯義命秩之數典冊之文不如此無以慰朕心而荅民望國有常典卿毋復辭

賜太師文彥博辭免不拜恩命許批荅

元祐二年八月

二十七日

卿義重股肱望隆堂陞陞廉遠則堂皇峻股肱逸而元

首安故出異恩特鑄苛禮而卿深執恭翼力守典刑確然自陳義不可奪勉從其意愧歎于中

賜太師文彥博辭免不拜恩命允批荅

元祐二年八月

二十七日

朕優禮師傅達德齒之尊以亟拜為可略古之道也卿謹嚴朝廷明君臣之分以不拜為未安禮之節也道並行而不悖義有重而難移勉循所陳不忘嘉歎

賜宰相呂公著乞罷相位不許斷來章批荅

元祐

二年八月
二十七日

孔子曰苟有用我者暮月而已可也三年有成夫以聖人猶待三年而後成功況其下者今卿助我為治自以為既成矣乎其未也譬如玉人雕琢玉中道而易之豈復成器哉

賜宰相呂公著乞罷相位不允斷來章批荅

祐元

二年八月
二十七日

古者君臣之間率常千載一遇今聖母在位正身虛已

仰成輔弼雖踈遠小臣猶欲畢命自效而卿乃以小疾
求去縱無意於功名獨不惜此時乎勉卒乃事使百姓
富足四夷乂安然後謝事歸老豈不臣主俱榮哉

賜宰相呂公著乞罷相位除一外任不許批荅

元祐二年八
月二十八日

夫以才御物才有盡而物無窮以道應物道無窮而物
有盡凡今之患所乏非才以卿篤於愛君必能建長久
之策澹然無我可以寄枉直之權二年于茲百度惟正

事既就緒民亦小康至於微疾之屢攻此亦高年之常理卿其良食自輔為國少安譬如止水之在槃豈復勞心於鑒物心且不勞而況於力乎

賜宰相呂公著乞罷相位除一外任不允批荅

元祐二年八月二十九日

朕以天下之大知為君之難有朽索馭六馬之憂有抱火措積薪之懼正賴多士協於一心朝夕以思彌縫其闕凡今中外執事膺力之畢陳視吾一二老臣進退以

為節卿若無事而引去人將相顧以自疑而況邊鄙未寧兵民多故而予左右之老先自求於便安則夫疎遠之臣何以責其盡瘁勉輔不逮期於有成

賜宰相呂公著辭免不拜恩命允批荅

元祐二年九月

一
日

卿執德惟一守禮不回不以坐論為安而以拜上為泰使朕不盡養老之意而卿得畏威之道勉從其志嘉歎不忘

賜宰相呂公著辭免不拜恩命許批荅

元祐二年九月

一日

君之視臣譬之手足方責其大不强所難而卿深執謙恭力求避免深惟孔子事君盡禮之義曲從其請以儆惰媮

賜太師文彥博上第一表乞致仕不允批荅

元祐

二年九月八日

省表具之卿之求去蓋數矣言不為不切而朕終莫之

從朕之留卿亦至矣禮不為不盡而卿終莫之亮君臣之際情不相喻朕甚疑之夫樂丘園而厭軒冕亦古人之一節而非聖賢之高致尊者老以重朝廷蓋天下之大計而非沖人之私欲與其使朕屈公議以從卿曷若卿少貶其私意以徇天下乎

賜太師文彥博上第一表乞致仕不許批荅

元祐

二年九月八日

覽表具之卿之所以欲去者二疲於朝會勞於應物一

也功成身退欲享其樂二也而吾之所以必留者三卿
以傑人之資開物成務世不可闕一也弼亮四朝更涉
變故謀無遺策二也名冠天下進退之間為國休戚三
也吾方盡養老之道殺禮以優賢廟堂之上猶有足樂
則夫卿之欲去者可回而吾之必留者蓋不可易也

賜太師文彥博乞致仕不許斷來章批荅

元祐二年

九月十

一日

覽表具之為君難為臣不易非吾推誠無疑不能起卿

於安佚非卿忘身徇國不能從我於艱難召用之初中
外相慶搢紳莫不競勸父老至於涕流中道而歸其義
安在宜思一身之樂輕於社稷毋使庶人之議及於朝
廷

賜太師文彥博乞致仕不允斷來章批荅

元祐二年

九月十一日

省表具之君子安身崇德如山嶽之鎮開物成務如江
河之流若山嶽之鎮動搖不安江河之流行止自便則

物將交病人亦何觀朕之望卿無以異此宜守不移之志以成可大之功

賜宰相呂公著上第一表乞致仕不允批荅

元祐

三年二月
二十八日

省表具之古者世臣譬之喬木粵自拱把至于棟梁傑然羣材之中夫豈一日之力卿擢自仁祖迨茲四朝光輔朕躬允有一德不獨卿無心而事自定抑亦民既信而功易成方今布在朝廷豈無豪傑之士猶當養以歲

月待其德望之隆卿雖欲歸勢未可去宜安厥位以副朕心

賜宰相呂公著上第一表乞致仕不許批荅

覽表具之卿三世將相一時著龜不求備以取人則房
喬之比其經遠而無競有謝安之風用能寧輯我家靖
共爾位政在元老人無異詞胡為厭事而求歸不復為
國之長慮方今官冗財匱歲艱民貧天步難安國是未
定若方勤於樸斲而遽易於工師人其謂何勢必不可

告老之請吾未欲聞

賜宰相呂公著上第二表乞致仕不許斷來章

批荅

元祐三年三月二十九日

覽表具之難進易退固君子之常節久勞思逸亦老者之至情然心存社稷則常節為輕身繫安危則至情可奪惟卿體國豈待多言苟大義之未安雖百請而何益宜安厥位勿復此辭

賜宰相呂公著上第二表乞致仕不允斷來章

批荅

元祐三年三月二十九日

覽表具之宰相不自用人主不自為予欲識人物之忠邪故以卿為水鏡予欲知利害之輕重故以卿為權衡苟明此心雖老猶壯與其輕去軒冕獨善其身孰若優游廟堂兼享其樂益敦此義勿復有云

賜新除依前中大夫守中書侍郎劉摯辭免恩

命不許斷來章批荅

元祐三年四月十二日

省表具之卿蹈道深遠守節淳固雖不留於儻來之物

而有志於行可之仕樂告以善勇於敢為進不求當世之名退不叛平生之學未嘗為枉尺直尋之事夫豈有見得忘義之嫌哉毋復過辭往踐乃事

賜劉摯辭免恩命不允斷來章批荅

元祐三年四月十二

日

省表具之朕纘服之初卿言責是任歷陳治道之要以立太平之基朕欲行其言遂授以政歲月未幾紀綱略陳欲究觀心術之微宜擢居政本之地苟無愧於允蹈

豈不賢於力辭往服官箴勿違朕命

賜新除依前中大夫守尚書左丞王存辭免恩

命不許斷來章批荅

元祐三年四月十二日

省表具之夫志大有遠略器博無近用以卿忠義開濟
何施不宜今以次遷何足辭也益堅無倦之意以觀可
久之業

賜王存辭免恩命不允斷來章批荅

元祐三年四月十二日

日

省表具之夫陞簾之增所以隆堂奧位次有敘所以尊
朝廷朕既樂得於英才復以時而遷用庶幾華國非以
寵卿祇率厥常毋廢朕命

賜新除守尚書右僕射兼中書侍郎范純仁上

第一表辭免恩命不允批荅

元祐三年四月十二日

覽表具之夫有烏獲之力然後可以付千鈞有和扁之
功然後可以寄死生故宰相之任非所以寵人臣也無
其德而當之為不智有其材而辭之為不仁若卿之才

德亦可謂稱矣往思其憂以稱天下之望

賜范純仁上第一表辭免恩命不許批荅

元祐三年

四月十二日

覽表具之吾聞之乃烈考曰君子先天下之憂而憂後天下之樂而樂雖聖人復起不易斯言卿將書之紳銘之盤盂以為一言而可以終身行之者歟則今茲爰立之命乃所以委重投艱而已又何辭乎

賜新除司空同平章軍國事呂公著上第二表

辭免恩命不許斷來章批荅

元祐三年四月十二日

省表具之夫國以得人為強如猛獸之衛藜藿以積賢為寶如珠玉之茂山川湛然無為物自蒙利故崔公發議則淄青慙服知朝廷之有人蜀使抗詞則孫權回顧歎張昭之不在得失之效豈可同日而語哉朕之用卿意實在此國計之重可無復辭

賜新除司空同平章軍國事呂公著上第二表

辭免恩命不允斷來章批荅

元祐三年四月十二日

省表具之周之詩曰無曰予小子召公是似唐之雅曰
惟西平有子惟我有臣夫父子君臣之間光明盛大如
此載之簡策被之金石豈獨閨門之寵足為邦國之華
再省來章具陳先烈雖朕寡昧不敢庶幾於仁祖而卿
忠孝當念服勤於世官祇率厥常毋違朕命

賜新除守尚書左僕射兼門下侍郎呂大防上

第二表辭免恩命不許斷來章批荅

元祐三
年四月

省表具之卿有夷狄盜賊之虞倉廩禮樂之歎陰陽風雨之憂此三者誠當今之大計朕之所以中夜不寐輟食太息者正為此也孟子曰責善於君謂之恭夫既以責其君而不以身任之者非仁人也願卿慨然當古人之重畧世俗之謙務踐斯言憂此三者

賜呂大防上第二表辭免恩命不允斷來章批

荅

元祐三年四月十二日

省表具之夫任賢使能天下之公議而辭大就小君子

之自守也惟名器爵祿朕所不敢授以私則勞謙退避
卿豈得必行其意所謂唐虞三代信任之至以致稷契
伊呂德業之隆若卿之言朕敢不勉請事斯語永觀厥
成

賜新除守尚書右僕射兼中書侍郎范純仁上

第二表辭免恩命不許斷來章批荅

元祐三年四月

十二日

省表具之卿以明哲自託不能非獨以見君子勞謙之

光亦因以知前世用人之弊功烈無取誠如卿言夫次公減於治郡子元不如為將非獨文獻不足蓋其才德有偏如卿昔在朝廷首談孟軻之仁義旋為師守專行羊祐之威信慨有大志似其先人苟推此心施于有政則太平可望而小節可畧矣

賜范純仁上第二表辭免恩命不允斷來章批

答

元祐三年四月十三日

省表具之自昔先帝之世屢歎才難及朕嗣位以來專

用德選雖爵祿名器出於獨斷而長育成就實在群公
長短不遺輔相之責苟無為國養人之意必有臨事之
使之憂朕用慨然當食不御思得英雋之老共收文武
之朋惟卿篤於憂國明於知人灼見朕心宜在此位往
任天下之重毋事匹夫之廉

賜新除依前正議大夫守門下侍郎孫固辭免

恩命不許斷來章批荅

元祐二年四月十三日

省表具之卿奉事先帝有勸學之舊與聞機政有已試

之功固非躡等之遷獨恨用卿之晚勉循大義毋事小廉

賜孫固辭免恩命不允斷來章批荅

元祐三年四月十三日

日

省表具之卿向自西樞出殿藩服頃由近輔入侍燕閒昔有未識之思今乃日聞其語既見君子無踰老臣當益勵於初心尚何辭於新命

賜新除中大夫守尚書右丞胡宗愈辭免恩命

不許斷來章批荅

元祐三年四月十四日

省表具之卿自天官擢領風憲下有庇民之意上有愛君之忠度其不以利回是故可以大受丞轄之任非卿孰宜毋復固辭以就遠業

賜胡宗愈辭免恩命不允斷來章批荅

元祐三年四月

十四日

省表具之人才之難古今所病忠厚者多乏於用強濟者或涼於德有德適用如卿幾人方觀卿謀國之良以

成朕知人之美深體此意徃祇厥官

賜新除依前中散大夫充樞密直學士僉書樞

密院事趙瞻辭免恩命不允斷來章批荅

元祐

三年四月
十四日

省表具之君子之仕也喜於知而樂於用如卿之言結
髮從仕而白首遇合則君子之用舍進退蓋亦有時矣
勉行其道無失斯時苟能遇事而必為則亦立功之未
晚古人之事將見於卿

賜趙瞻辭免恩命不允斷來章批荅

元祐三年四月十四日

日

省表具之卿挺然孤忠白首一節逝將力求於退避夫豈有意於進取哉特以雅望既隆公議所在方將度才而授任固難越卿以用人往踐厥官毋違朕志

賜正議大夫知樞密院事安燾乞退不允批荅

元祐三年五月十八日

省表具之宥密之司安危所寄雖羌酋款塞少休烽燧

之虞而夏童跳邊猶煩筆策之馭翻然求去義有未安
夫以朕大烹優賢之資豈不能助卿養志之具足以毋
廢子職而能兼為國謀豈不休哉

賜正議大夫知樞密院事安燾乞退不許批荅

元祐三年五
月二十八日

省表具之乃眷西樞實參大柄吾欲兵民兼利戎夏兩
安自非宿業更變之臣懼有傷財玩寇之患卿當念先
朝委重之久未可以親庭歸養為詞勉安厥官以副吾

意

賜新除殿前副都指揮使武泰軍節度使苗授

上第一表辭免恩命不許斷來章批荅

元祐三年

七月十九日

省表具之試材已舊謀帥尤艱故以久次用人欲其深
練於事而卿辭以錮疾豈所望哉速即乃官毋復退避
賜新除殿前副都指揮使武泰軍節度使苗授

上第二表辭免恩命不允斷來章批荅

元祐三年

七月十九日

覽表具之環衛之嚴節制之重誕告多士以長萬夫朕
豈輕用其人哉確然固辭未喻厥指徃祇朕命毋曠乃
官

賜大師平章軍國重事文彥博上第一表乞致

仕不許批荅

元祐三年九月二日

覽表具之昔師尚父九十秉旄杖鉞猶未告老此諸葛
元遜所以屈張昭也而衛武公百年猶箴儆於國曰無

以我老耄而捨我此左史倚相所以誨申公也今鄉壽
考康寧而退托衰病自引求去獨不念天下之士有如
彼二子者議其後乎姑安厥官以荅公論

賜太師文彥博上第一表乞致仕不允批荅

元祐

三年九
月二日

覽表具之朕聞之成王之政周公在前召公在後畢公
在左史佚在右四子挾而維之目見正色耳聞正言一
日即位天下曠然未聞四子以老而求退亦未聞成王

以老而聽其去也朕雖不德猶庶幾成王之治卿雖老矣獨不能以四子之心為心乎勉卒輔朕無愧前人

賜新除守司空同平章事呂公著上第一表辭免恩命不允批荅

省表具之夫司空之官自唐以來雖無職事而孔子所謂天子有爭臣七人者三公首當之朕欲聞仁人之要言與天下之大計非此元老將安取斯卿其省思慮慎寢食優游廟堂為朕謀其大者

賜新除守尚書左僕射門下侍郎呂大防辭免
恩命不允批荅

省表具之夫天以斯民付人主而人主付之宰相若不
得人為慢天之所付朕敢乎哉如卿瑰姿偉望宏毅開
濟朕既用之不疑而卿自疑何也徃脩厥官毋斁朕命
賜新除尚書左僕射兼門下侍郎呂大防上第
一表辭免恩命不許批荅

覽表具之自英廟擢卿於言責而先帝用卿於西師則

朝廷待卿之重蓋出於祖宗之意矣孔子曰吾之於人也誰毀誰譽如有所譽其有所試若卿者可謂屢試矣卿而不宜其孰宜之

賜新除守司空同平章事呂公著上表辭免不
許批荅

覽表具之天下之事使壯者治之老者謀之自堯舜以來未有易此者也今卿議政而不及事勞心而不及力吾自以為得養老之禮而不失用賢之實卿何辭之堅

也

生獲鬼章文武百寮稱賀宣答詞

元祐二年八月二十八日

太皇太后

種羌叛換西鄙繹騷首出偏師遂擒元惡安邊之喜與卿等同之

皇帝

凶狡就俘羌戎一震既增吏士之氣亦寬戍守之勞靖寇息民與卿等同喜

八月二十八日入內高班蔡克明傳宣取批荅
宰臣以下賀生獲鬼章表

太皇太后


國家偃兵息民涵養中外鬼章無故犯順神人棄之雖
廟社無疆之休亦將相一心之助封章來上嘉歎不忘
皇帝

朕上承慈訓下盡羣策務漸寬於民力本無意於邊功
既狂狡之就擒知休息之有日再閱來奏嘉歎于中

東坡全集卷一百一十三

謹案卷一百十二第二十六頁前三行罷散坤成
節道場刊本脫道字今增





總校官庶吉士 臣張能照

校對官庶吉士 臣徐如澍

謄錄監生 臣陳增